

Dynało Bakro

Sys dawa hara daleske, dre ciry kaj Romen sys lengro them, lengro khynigo i but ławyr łaćsie bucia. Dzido sys wtedy Rom kaj sys łaś duj ćhawe. Dawa pe kerelys dre tasawe ciry kaj phuredyr ćhawo sys godo i barwało a ternedyr dynało i ciororo - doleske dad dyja łaśke pe ław Bakro.

Bakro pe na przelełys dalesa, pał dowa syr pszał i dad dzianys te basiaweł te kircima, jow besielys raty paś jag i dykhetys pe cierhenia, a dre dywes ginelys rukha.

- Ot dynało Bakro – phenelys dad syr rysiołys basiaibnatyr – peso tuke dawa? Łe fedyr basiady i jaw jamenca. Ne jow na kamełys. Pał dowa phendzia:

- Cierhenia phende, a rukha pukade mange kaj pał do berga, pał do kało weś, sy Raj sawo ciordzia khynigoskre ćha i rykireł ła dre bary filacin. Dziawa ła te porodeł i jaweła dzia kaj ła rakhawa.

- Ale tu san dynało – rozsanzia pe pszał. - Tuke pe kameł khinigoskre ćha, a mange gode pszałes. Dzia może gody rakhesa.

- Dzia, dzia może manusia sykawena tuke gody – dodyja dad.

Dzia syr phende dzia pes kerdzia. Lija pesa Bakro maro, bałewas i geja.

- Dziaw kaj man poligirena jakha.

Przegeja dzia dywes, duj i nikones na dykcia. Pe tryto dywes wgeja hor dre weś. Na sys łaś ćsi te hał i miśto sys bokhało.

- Hyria sweto – dumindzia – bokhałeske na deła te hał, a ciororeske wast na podeła. Weś tez daj dzia syrby ławyciano. Rukha baredyr. Drom tykniołys, tykniołys aż nasiazija. Bakro terdzija.

– Syr ćsi nasiaziom man- zdaryja i bećcia paś ruk.

- Hyria – dumineł Bakro i rozdykheł pe.

- Sy! – phendzia bo dykcia kali i na siukar filacin.

- Hej sy doj kon?! – dyja godli i mardzia dre wudara.

Wudara piradzine i wygeja łendyr baro, hyria, kało syr siehta Raj.

- Kon tu san? – pućcia pe.

- Me som Bakro. Rodaw haben i soiben. – odphendzia przedariakirdo.

- He, He, He – zasanzia pe Raj – so keresa te me buty rakhesa jek i ławyr.

- Miśto kerawa te tu buty – phendzia Bakro

- Dykhes da wudara? Dawa sy wdziaben te desiuduj khera, dre sałe sy terde desiujek sownakune manusia. Tasiarla i raty jandesa łenge sownakuno haben. Te desiudujdo kher na zadyk. Pošli berś, so saro łaćsieś keresa, doresesa łowe i dziasa duredyr.

I dzia Bakro kerelys, sys łeske łaćsies bo pes nahałys i wysowelys. Baro hyria Raj wytradelys pe ceła dywesa i jawelys raciasa. So moło syr Bakro poddziałys pasie do sownakune manusiendyr zdelys pe łeske kaj jone rowen.

Jekwar dzia pe zadumindzia, kaj nawet na dykcia i piradzia wudara te desiudujdo kher. Na sys doj ćsi, tylko bary piry dre sai soś keriołys.

- So dawa, na zumni, na siut, a kerioł?

- To ćsiuw tuke kuty - phendzia piry. Hasa kuty a tyry gody jaćheła sownakuni, dzi sownakuno, celo jaćhesa sownakuno!

- O! Bakro zbandzija pasie piry.

- Na ha - phendzia konś bergatyr.

Bakro zdykcia i zameja. Sys doj sphandli siukar dziuwli. Jakhendyr nasienys łake jaswa i wperenys te do piry.

- So hasa zaparuwesa pe dre sownakune manusiestyr. Dzia pe kerdzia dołenca kaj jawenys pał mandyr. Syr dykhenys sownakaj, zabyskirenys mandyr i kana terde dre desiujek khera.

- Kon tu san – pućcia pe Bakro

- Me som khynigoskry ćhaj, kaj ciordzia man do hyria Raj.

- Me tut rodawys! – dyja godli Bakro.

- Dykhes do tuśni kaj sy terdy pasie dudali? Wypi łatyr pani a jaćhesa najzorałedyr manuś pe sweto. Ker dawa sygo, bo nahara jaweła hyria Raj. Htyłdzia Bakro tuśni i wypija.

Pe jewkar wgeja dre lestyr bary zor.

- Dzia kana łe pharta i kangli, kaj sy Ras dre łeskro kher. I dzia łe też gres, tylko do najtyknedyres bo jow sy najsygnedyr.

I terdzine duj dziene gił baro kher, wbešte pe grestyr i hylcion.

Do graj sys dasawo sygno kaj dzinelys te unasiel dre berga. Ale so dawa już kerel pes rat?

- Zdyk Bakro pał pestyr i phen so dykhes? - pućcia pes ćhaj.

- Dykhaw soś kało dre bolipen, kaj pał jamendyr nasiel.

- Dawa do hyria Raj, sygo wychurde kangli – adzia Bakro kerdzia i pe jekwar wybaryja weś pał łendyr. Zarykirdzia Ras, ne na pe hara. Raj przemardzia pes pełde do weś i pałe pał łendyr nasielys.

- Zdyk pał pestyr – pałe pomangdzia ćhaj – so dykhes?

- Dykhaw syr brysind pereł i pałe soś kało nasieł – dawa pałe jow i but holinekro sy. Ćhurde do phartyca. Ćhurdyja Bakro pharta i pe jewkar rozėsiudzija baro pani pał łendyr. Przenašte kuty, a doj dykhen kaj hyria Raj wypieł do pani. Mało so saro na wypija, kereł pe baredyr i baredyr i... na wrykirdzia. Pharadyja hyria Raj.

- Sam pe frej – zasandzia pe ćhaj – dyk doj dyćli myre dadeskry fiłacin.

Htyłdzia ćhaj Bakres pał wast i ligirdzia łes te peskro dad.

- But kamenys man te rakheł, but dykte sownakaj i zabyskirde pał mandyr. Sykade kaj jone kamenys barwalipen a na man. To mišto kaj dzia łenge wygeja. Bakro na kamełys barwalipen i dołeske kana sy daj manca.

- Godes rakires myry ćhaj, kana ciro pe biaw.

Bakro i ćhaj hara bersia sys dzide bahtałes a bešte sys dre weś khetane peskre semencasa.